

Pedaguogēnē regiejēmā

Jumuoreska

Isēmēslējau aš kārta,
Kas muokīkluo īr per tvārka:
Nuors tū vākū tēik belēka,
Bet etatu kēik privēsa!..

Vēskas vāka če geruovē...
Dērbam, plošam kap verguovie.
Kalnus puopieriu prikruoviem...
Vo, kou rēk, ēr neišmuokiem.

Vākā kningu nebeskaita,
Paktus rašiniūs iškraipa.
Ni daugības nebežēna,
Internetūs ēiška lēna.

So kou Lietova rēbuojēs,
Nebežēna, nuors žegnuojēs.
Nepažīst ni tievēškēlēs.
Ni pražīdusēs kvietkēlēs!..

Daug kuo vākā nebežēna...
Anus kētēp jug augēna.
Po žvaigždīnus tiktā skraidē,
Mobilēsēs nuolat žaidē.

Nuors repormas ruoju kūrē,
Vākū nikāp neožbūrē.
Dabā vākā jau šakuotē –
Nuor be darba būtē baguotē.

Vēsē kaltēn tik švēitēma
Ož sokrīposi vežēma.
Vēsor klaidū milijuonā...
Tuokēi dabā ēr tēi puonā!..

Pol tik vēsē vaduovautē,
Ka galiētu nauduos gautē.
Nuors tuo srētie neišmāna,
Aklā kor dēdinga plāna!..

Rēk naujuoviu, muodernībiu
Ēr vēsuokiu prašmatnībiu:
Paukštēs laksta anēi po dongu,
Vo nemāta, kas īr po longu.

Sāva krāšta nepažīstam,
Nuors i praeiti vēs grīžtam.
Ginklās svetēmās ginkluotē,
Polam vākū pruota šloutē.

Savās žuodēs nebrokoujem –
Tiktā anglēškā kukoujem.
Diekuo tuokēi pasēdariem –
Gal ne sāva vāga variem?!

Grīškem pri savū vertībiu
Ēr bronginkem lietovībē.
Jau ēr tēp tik saujē besam –
Pagalvuokēt, kou mes lesam?!